

PÈRCHÈ A VANTA DÌ "NÒ" AI DIALET A SCÒLA

L'articol "Devoluzione, il veleno nascosto" dël Professor Gian Luigi Beccaria, President ëd l' "Associazione di Linguistica Italiana", publicà ancheuj 29 dè Stèmber 2002 su "La Stampa" (sempe chila!), an dà l'ocasion ëd dëscute torna ij concet, e ij precon-cet, ch'a anvlupo tuti ij dëscors an sle lenghe, ij dialet e le minoranse dël Bel Pais (ch'a l'é nen mach un formagg, darmagi).

Èl Professor Beccaria a pija l'andi dal proget ëd lej costitussional presentà dal Pressident dël Consèj dij Ministr italian, Berlusconi, e dal Ministr italian për la Devolussion, Bossi, con ël but ëd modifiché l'articol 117 ëd la costitussion italian-a (a l'é sempe bin esse ciàir an disand ch'i parla d'Italia). Con la neuva lej l'istrussion a vnirà a passé apopré esclusivament sota 'l contròl e la responsabilità dle region (italian-e).

An particolar, le region a l'avran competenza a rësguard ëd cola "part dij programa scolastich e 'd formassion dë specifich interesse dla region".

E si ël professor a nufia ël trocion: a sarà pa che peuj "ij dialèt a vniran a esse materia dë scòla?"

Mi i son nen otimista coma 'l professor e i podrìa bin consolelo an disandje che 'd sì, a mosteran pròpi ij dialèt, ij lengagi 'd cioché che tant a piaso a drita, a mancin-a e, 'dcò, a tanti autonomista. As cobio bin con la bagna e 'l buji, o, pi an creusa ant la penisola, con la "pommara". E a stan bin con ël bleu, ant ël sens ch'a fan pròpi "dëscuverta dle reis popular", "antiglobalisassion" (ël buji contra McDonald's, i veule buté?), e "tradission". E dzortut, i giontoma noi, ij dialèt a son nen pericolos coma le lenghe.

Nòst Professor Beccaria a peul donca sté tranquil e deurma coma 'n pocio ël seugn ëd j'angioj. Ma a vanta fé tre considerassion seriose: prim, a l'é motobin probabil che ël tòch ëd Beccaria a sarà nen l'ultim che ij nòsti colega a "La Stampa" a vè smon-o (a mi nò, përchè mi i jè leso nen). Scond, a "la Stampa" a son democràtiche e, 'd sigur, av faran lese tante opinion. L'anportant a l'é mach ch'a diso tuti l'istessa ròba — democràtiche a va bin, ma avèj ëdcò idéje diverse nò, esagero-ma nen.

E, a la bon-a fin, a vanta



nen dësmentié che le gava-de e le tavanade a son peuj ëd le cirese e un-a as na tira n'òtra dapress.

A sarà donca 'l cas ëd comenté l'articol un pòch pi an creus.

Antrant, i notoma che nòst Professor a nòmina, e nen un-a, ma doe vire, ël piemontèis. A peul desse ch'a sia mach përchè a scriv ansima a "La Stampa", ma nojàutri i soma a la bon-a e i lo ringrassiamo l'istess dël cadò.

A nòmina, na prima vira, ël piemontèis an disand ch'a vanterà an minca

manera evité 'd gavé temp a l'italian për mosté "piemontèis, sicilian, furlan" e via parèj. Përchè, an dis, l'arzigh a l'é col ëd fé chërse na neuva generassion ch'a mastija un dialèt a la bon-a e un pòch d'anglèis, senza conòsse a la pèrfession, la "lenga nassional", che, an arcòrda, a l'é stàita na conquista motobin longa. A l'ha rason: l'italian a l'é tant la lenga genita dël pais che Tullio De Mauro (ch'a l'é stàit ministr ëd l'istrussion e a l'é nen pròpi un nòst amis) a l'ha calcolà che, ant ël 1861, a la nassita dël

Regn d'Italia, dij 25 milion e subia d'italian a la parlesse pi ò meno a 600.000 — che a fa quaicòs come ël 2,5 % ëd la popolassion (Tullio De Mauro, "Storia linguistica dell'Italia unita"); àutri studios a son na frisa pi generos...). Mersi a la scòla (pùblica e obligatòria), al servissi da soldà e al contorn ëd guere e massament che l'Italia a l'ha fàit da quand ch'a esist (i chërdo che l'Italia a l'abia mai pèrdù soa bela ocasion ëd fé na guera — che peuj le guere a l'abia perduje tute am fa mach piasì), la lenga 'd Dante e 'd Maurizio Costanzo a la parlo tuti.

Ij dialèt a vanta cudije, an dis ël Professor (i lo vèdde che ij dialèt a fan fin e a stan bin con ël bleu?), ma a l'é peuj pròpi necessari che un a prenda ëdcò a scrivje? As podrìo fé dle bele arsèrche an sl'architettura local, ij proverbi, le manere 'd dì, le faule, e le "inchieste dialettali sulle parole perdute".

Tut sossì am ancòrda quaicòs... quaicòs sì davzin, con ij sold ëd la region... ma a l'é mej ch'i staga ciuto...

Përchè peuj, an fa savèj, ij giornaj e ij liber a son an italian. Contut che ël giornaj dij piemontèis es-cet, "Assion Piemontèisa", a sia an piemontèis, lòn che ël Professor a dis nen, e che, a la fin, a lo rosija për dabon, a l'é che a l'é pròpi nen vera che la siensa, la tecnica e la cultura a sio an italian. Sempe 'd pi, a l'é an anglèis e i soma rivà a la mira — esperiensa personal! — che student italian ant le università italian-e minca tant a preferisso scrive soe tesi an anglèis, për podèj-je peuj publiché (tendensa che mi pèrsonalmente i faso 'd tut për giuté, as capiss). I lo sai che a tanti autonomista sòn a fa nen piasì. Ma a sbalio: l'italian a l'é un di dòp d'autèr un dialèt. Un dialèt èsgnor e potent, ma un dialèt.

E peuj, a seguita nòst Professor, e si a nòmina ël piemontèis për la sconda vira, "a-i son ëd problema pràtiche": che sòrta 'd piemontèis a vanrà mosté, e che sòrta 'd margneul e d'albanèis?

Si ël Professor an fa n'autèr cadò, përchè an buta ansema a Sard e Albanèis, ch'a dovrìo esse lenghe "pèr dabon", scond a le lej italian-e, nò? Coma a vorèj di... i pensave pa ch'i feisso an sèl serio? I seve na minoransa, i parle na lenga, ma peuj pensé nen a mostela a scòla, për piasì... esse nen ridicoj... e dzortut, chitela lì 'd chërde che le reis popular a sio stait crasà da la lenga ufissial, coma s'i l'avèisse, pensé mach, chi sa che "specificità etnica". Përchè peuj, a seguita ël

Professor, coma ch'as fa a mosté na lenga che a l'ha nen na regola gramatical?

Còs ch'i veule féje, i l'hai fin-a onta a dovèj comenté ël savùj ch'a seurt da na piuma përparèj. Mej lassé perde e rivé an pressa a la fin. Andoa i soma avverti: "pijomse bin varda 'd campé via la lenga 'd tuti, la lenga nassional, là lenga italian-a". E a l'ha rason: dzortut se i seve Pressident ëd l'Assiassion ëd Lenghistica Italian-a, av conven nen...

ël nemis ëd la patria

PIEMONTE CH'A BOGIA,
(pòch, ma a bogia)

Dòp ëd meis ch'is vèddio nen, i l'hai ambatù, a la fin dè stèmber, l'editor e amis Robert Chiaramonte ch'a l'ha fame omagi ëd l'ultima creatura 'd soa ca editris. As trata dël liber "La Selva di Chambons". Chambons a l'era 'n comun ëd la Val Chison postà a l'invers che, a na bela mira, a l'era dventà na frassion ëd n'autr comun tacà, Mentoulles, e peuj tuti doi a son ëdventà frassion ëd Fenestrele. A le spale 'd Chambons a-i è, da sécoj, un gròss e bel bòsch ëd malèzzo, bòsch ch'a l'ha sempe colpì la fantasia dè scrittor e poeta tant a l'é vera che De Amicis d'ës bòsch a l'avìa dit ch'a l'era "... la pì bela selva dle Alp Còssie, gròssa, s-ciassa e sombra coma na coallera senza fin ëd gigant arambà an sij fianch ëd la montagna ant la spetativa d'un comand misterios për calé a val e satì 'l Piemont".

"La Selva di Chambons" a l'é pròpi la stòria 'd cost bòsch contà an italian. Na stòria ch'as dësgramisse-la fra fàit èstòrich, ruse fra pais, un po' 'd botanica e 'n po' 'd geologia.

Coma tuti coj ëd Chiaramonte ël liber a l'é bel, bin fàit, bin confessionà e con ëd fotografie luminose ch'a 'rchinco 'l test.

E, an pi, cost liber a bat ël recòrd për sponsorisassion e colaborassion. A l'han sponsorisà 'l liber: la Region, la Provinsa, ël Còrp Forestal ëd lè-stat, ël Comun ëd Fenestrele, la Comunità Montagna Val Chison e le Montagne d'OC (?); a l'han colaborà: l'Assessor Robert Vaglio, l'Echip Forestal ëd la Val Chison, l' "Ex Proloco Chambons Depòt", la società Metan Alpi, ël dottor Berger, ël geometra Scannella, ël dottor Bòcca, ël professor Passet Gròs, madama Challiol, ël professor Martin, ij frej Clapier e 'l professor Contino.

Èl liber a l'ha 123 pagine.

Èdcò cost ann, coma da tanti ani a sta part, a pija l'andi, al Teatro Monteròsa, la rassègna dël teatro còmic piemontèis "Tutdarije".

A pija l'andi vèner 25 e saba 26 con la comedia "Na morosa për finta" ëd Secondin Trivero antèrpretà da la Compagnia "Èl sipariet ëd San Matè" ëd Moncalé, e a seguita fin-a a mars an presentand a jè spetador des fra le pì vajante compagnie amatorial piemontèise. Chi a veul fesse 'n po' 'd sangh bon con coste rappresentassion ch'a s'anforma al nùmer 011.284028. L'amusament a l'è garantì.

N'autèr amis dël Piemont a l'ha lassane.
I l'oma savù, an artard, ch'a l'è mancà

Ernest Öllino,

fondator e animator ëd la compagnia ëd teatro amatorial "J'Alpin ëd Borgà Parela".

Assion Piemontèisa a l'è vzin-a, për condivide ëss gròss deul, a la famija e a j'amis che con chiel a l'han dividù le fatighe dël palchsenich.

